



Il niev Center da cumpra «Coop Grüneck» vegn aviarts gievgia ils 9 d'uoost.

FOTO M. CABALZAR



Il gestiunari Erich Romer (dretg) e siu substitut Christoph Hulliger midan casa e selegnan d'astgar beneventar la clientella el niev Coop Grüneck da l'autra vart dil Rein.

FOTO SURSELVA

Coop «Grüneck» a Glion cuort avon sia avertura

Questa jamna arva il niev Center da cumpra dil Coop a Glion/Grüneck sias portas

DA MARTIN CABALZAR

■ **Da gievgia tochen dumengia festivescha il Coop da Glion l'avertura dil niev center da cumpra «Grüneck». Quel cumpeggia era la fatschenta d'habitar e durmir «Jysk», l'ustria «Shaka» ed il tancadi «Socar». Gest ella vischinonza sesanfla il «Coop Bau+Hobby» existent. Il niev edifices ha custau 26,4 milliuns e porscha 40 posts da lavur.** Durent ils quater gis d'avertura ufficials che cuozan da gievgia entochen dumengia offereschon tut las fatschentas involvidas purschidas specialas. Ton per las ulteriuras stizuns da Glion e Schluein sco per las stizuns els vitgs vischinonts munta il niev center da cumpra ina ferma concorrenza cun ina purschida attractiva ed ordvart vasta.

In center da cumpra attractiv

Il niev center sigl areal da Grüneck ed ella vischinonza dil Coop Bau+Hobby ei levamein accessibels cuogl auto naven dalla rundella dalla Via Sursilvana el vest da Glion. Anovians dat il niev edifices en egl cun sia generusa applicaziun da lenn, cun ses mirs da crappa grossa e sia illuminaziun migeivla. Tenor il meinagestium *Erich Romer* porscha il niev concept dil Center da cumpra «Grüneck» in ambient che promova l'atmosfera fiera. «Plinavon savein nus porscher sin ina surfatscha da 2000 meters quadrat in sortiment essenzialme in pli vast che tochen dacheu el

stabiliment actual alla Via Santeri», di Romer. E siu substitut *Christoph Hulliger* concretisescha quei cun numnar las purschidas augmentadas ella partiziun da products da bio, fretgs e legums, paun e rauba da garnezi, latgiras e caschiels, sco era da products fretgs Convenience/Take away. La purschida seigi el ver senn dil plaid «cudizzonta», di Hulliger.

Quei vala cunzun era per la purschida da carns ed pèschs che vegnan tgradas permanentamein da personal. «Leu vegn offeriu permanentamein snacks ni tschaveras per la pausa dallas nov, per gentar, marena e tscheina ch'ei pachetai da frestg e che vegnan fatgs amogna en ina vitrina che tegn a cauld las spisas», declara Romer. In ulteriur motiv pertgei che el e siu team selegnan silla nova stizun seigi era la partiziun da vins: «Tgi che tscherca in bien daguot, vegn segiramein ad anflar il convegnent el ravugl d'ina purschida da varga 700 marcas da vin, vin spimont e schampagner ord tut las parts dil mund», ei Hulliger perschudius.

Tgei che schabegia cuogl anteriur stabiliment dil Coop alla Via Santeri ei aunc buca clar. Ins seigi denton en contractivas cun plirs interessents, detagls veglien ins buca comunicar el mument, ha ei giu num sin damonda dalla LQ alla direziun.

Ault comfort da cumpra

Alla clientella vegn offeriu 76 parcadis gratuits sut tetg. Vida 4 cassas san ins

scannar sez la cumpras. Plinavon vegn scaffiu in post da recepziun per lavandarias da textil Oecoplan ed in post da distribuziun per products dil shop online dalla gruppa Coop. In kiosk cun ina partiziun da flurs ed in shop da Tchibo arundan la purschida.

Vischins che cumpletschan idealme in l'auter

Il niev Center da cumpra da Coop ei coligiau cun ina passarella cun il center Coop Bau+Hobby existent che sesanfla ella vischinonza. Leu sesanflan era aunc ulteriurs parcadis.

El medem baghetg sesanfla era la casa d'endrizzament per habitar e durmir Jysk sco era l'ustria Shaka. In tancadi da «Socar» cun vials da lischiva per autos cumpletscha la paletta dalla purschida.

Tecnica ecologica

Sco igl ei daditg usitau tier baghetgs novs e modernisaziuns pli grondas tier Coop han ins era dau duida atenziun agl aspect energetica ed ecologic el niev edifices a Crappa Grossa. Aschia han ins installau frestgeras cun liquids da sferdur ecologicamein neutrals che schanegian il clima ed era cazzolas da LED che gida a spargnar energia. L'energia da scaldar e per la preparaziun dall'aua caulda vegn explotada cun nezegiar l'energia reflectada dils indrez da refrestgentar, cun in scaldament da pellets da lenna e cun in indrez solar sin tetg. Aschia sappi ins reducir conside-

rablamein basegns d'energia e las emissiuns nuscheivlas da CO2.

Purschidas d'avertura

Durent ils empres quater dis d'avertura – da gievgia entochen dumengia – profitescha la clientella da purschidas specialas attractivas ton el supermarcau da Coop e Coop Bau+Hobby sco tier Jysk, l'ustria Shaka ed il tancadi Socar. Tier Coop dat ei il dieschdubel da superpuncts e mingamai naven dallas 10.00 (la dumengia allas 12.00) ligiongias da barsar dil gril per dus francs e la pusseivladad da degustar gervosa grischuna. Mintga gi vegnan ils affons diverti da Jamadu. Il mascot da lingia d'affons da Coop porscha buca mo ina roda da cletg, mobein era balluns e quei naven dallas 17.00.

Vendita dalla dumengia cun fiasta da famiglia

Era dumengia proxima ein las stizuns da Coop, Coop Bau+Hobby ed Jysk aviartas naven dallas 12.00 entochen las 17.00. El medem mument envida Coop alla fiasta da famiglia, purschend gaudi per pign e grond, denter auter cun in carussel, in casti da siglir ed ils artists da balluns Marcello ed Eveline.

Grondas investiziuns da Coop en Surselva

Ultra dils 26,4 milliuns che Coop ha investau el Coop Grüneck a Glion, inves-

tescha Coop uonn era aunc rodund 3,5 milliuns ella stizun a Mustér e rodund 2,1 milliuns ella stizun a Flem. L'avertura dalla stizun renovada a Flem ha liug ils 6 da december, quella da Mustér ils 13 da december.

Temps d'avertura dil Coop Grüneck: gliendisdis entochen venderdis dallas 8.00 entochen las 20.00, la sonda dallas 8.00 entochen las 17.00.

Coop Grüneck Glion en cefras

Empresa badelada: 21 mars 2017
 Construcziun interna: 23 avrel 2018
 Avertura: 9 uost 2018

Surfatscha da vendia: 2009 m²
 Schelenteras e frestgeras: 108 m²
 Magasins e locals tecnicos: 691 m²
 Adminstraziun e personal: 109 m²

Parcadi da clientella: 76 plazs

Investiziuns
 Edifices e construcziun criua: 20.0 mil
 Construcziun interna Coop: 3.8 mil.
 Mobiglia ed endrizzament: 2.8 mil.

Temps d'avertura
 Gliendisdis fin venderdis 8.00 - 20.00
 Sonda: 8.00 - 17.00

Buna partecipaziun alla Scuntrada 2018

Possessuras e possessurs da secundas habitaziuns da Tujetsch a Caischavedra

■ **(anr/hh) La tiarza scuntrada dallas autoritads communalas cun las possessuras ed ils possessurs da secundas habitaziuns da Tujetsch ha menau a Caischavedra.** All'excursiun ch'ei vegnida fatga la sonda vargada suenter miezdi da bellezi'aura ein rodund 200 persunas separticipadas. Denter quellas era autoritads communalas ed entgens ulteriurs indigens. Da bun'atmosfera ein las partecipontas ed ils parteciponts serendi cul tren ad Acla da Fontauna e naven da S. Catrina a Caischavedra cun la pendiculara nua ch'ei ha dau marena. Leu ei la raspada vegnida beneventada dil president communal *Beat Röschlin* e dalla presidenta dalla Cuminonza d'interess dils possessurs da secundas habitaziuns da Tujetsch, *Vreni Müller-Hemmi*. Omisus han accentuau la gronda partecipaziun e sutastrihau igl effect positiv dalla collaboraziun constructiva dalla vischnaunca cun la cuminonza. La spassegiada prevedida silsuenter sur il Bostg ni la Val



Impressiun dalla sentupada la sonda vargada el restaurant da cuolm a Caischavedra. MAD

Bugnei anavos a Sedrun han buca tuts fatg, oravontut buca pervia dalla calira. Sco quei che la cuminonza scriva en ina comunicaziun als mieds da massa, ei la Scuntrada 2018 vegnida terminada cun ina viseta da RockSeDrun, igl open air cun bia musica. Cuminonza ed autoritads communalas constateschan: Suenter la Scuntrada ei avon la Scuntrada. Il resun positiv motivescha da cuntinuar cun quella sentupada era igl onn vegnent ed aschia da procurar che quella daventi ina tradiziun.

Varga 300 commembers

La Cuminonza d'interess dils possessurs da secundas habitaziuns da Tujetsch dumbra pressapac 300 commembras e commembers. Ella ei vegnida fundada avon rodund treis onns cun la finamira da defender lur interess en vischnaunca. Il motiv principal persunter ein las novas tariffas sin fundament dalla lescha da turissem stadas. Ils empres onns da sia

esistenza ha la cuminonza instradau discussiuns cun la supranonza communal. Dapi la fundaziun ei quei dialog vegnius tgraus regularme in e sin fundament dils resuns – ton dallas representantas e dils representants dalla cuminonza sco dallas instanzas politicas communalas – ein quellas stadas constructivas. Denter auter han ellas menau a bia capientscha per las taxas che la vischnaunca incassescha per saver finanzia silmeins ina part dils survetschs pil turissem. La cuminonza emprova denton era da s'engaschar en favur d'in svilup persistent turistic en collaboraziun cun indigens interessai sco era organizaziuns localas e regionalas. Per quei motiv ha ella lu era scaffiu in premi. Alla davosa radunanza generala il zercladur han *Edi e Silvia Hess* obtenu igl emprem «Cardun d'argien» dalla Cuminonza dils possessurs da secundas habitaziuns da Tujetsch e quei sco reconuschientscha per lur engaschament sco menaschi agricolt da bio.